

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
DOM NARODA

Klub delegata bošnjačkog naroda



БОСНА И ХЕРЦЕГОВИНА
ФЕДЕРАЦИЈА БОСНЕ И ХЕРЦЕГОВИНЕ
ПАРЛАМЕНТ ФЕДЕРАЦИЈЕ
ДОМ НАРОДА

Клуб делегата бошњачког народа

BOSNIA AND HERZEGOVINA
FEDERATION OF BOSNIA AND HERZEGOVINA
PARLIAMENT OF THE FEDERATION
HOUSE OF PEOPLES
Caucos of the bosniak delegates

Sarajevo, 10.12.2025. godine

FEDERACIJA BOSNE I HERCEGOVINE
DOM NARODA

Bosnia and Herzegovina
Federacija Bosne i Hercegovine
PARLAMENT FEDERACIJE
SARAJEVO

3x4

Primljeno:		11-12-2025	
Org. jed.	Broj	Priloga	Vrijednost
02	-02-	2283	/25

Predmet: Podnošenje Nacrta Zakona o proporcionalnoj zastupljenosti konstitutivnih naroda i Ostalih u Federaciji Bosne i Hercegovine

U ime Kluba delegata bošnjačkog naroda u Domu naroda Parlamenta Federacije Bosne i Hercegovine, a na osnovu člana 155. Poslovnika o radu ovog Doma, podnosim odnosno upućujem u parlamentarnu proceduru **Nacrt Zakona o proporcionalnoj zastupljenosti konstitutivnih naroda i Ostalih u Federaciji Bosne i Hercegovine**, čiji se tekst nalazi u prilogu ovog akta (u daljem tekstu: Nacrt Zakona).

U tekstu Nacrta Zakona sadržan je pravni osnov, razlozi za donošenje i obrazloženja zakonskih rješenja.

Intencija podnosioca i predlagača Nacrta Zakona je izvršenje ustavne obaveze - na način da se zakonom integralno precizira ustavni princip proporcionalne zastupljenosti, s ciljem otklanjanja postojećih antiustavnih anomalija koje doprinose stvaranju jednoetničkih struktura u javnim institucijama, te da se osiguraju pretpostavke za pravednu implementaciju ovog ustavnog principa na cijelom području Federacije Bosne i Hercegovine.

Ovaj stav Klub je utvrdio na svojoj 30. sjednici održanoj u utorak 11.12.2025. godine, te kao predsjednik ovog Kluba imam obavezu predmetni Nacrt Zakona uputiti u dalju proceduru. Također, velika većina delegata Kluba bošnjačkog naroda su dodatno i svojim potpisom podržali da se Nacrt Zakona podnese, te će i taj akt biti dostupan u daljoj parlamentarnoj proceduri.

Na osnovu navedenog tražimo da se **Nacrt Zakona o proporcionalnoj zastupljenosti konstitutivnih naroda i Ostalih u Federaciji Bosne i Hercegovine** bez odlaganja stavi na dnevni red sjednice Doma naroda Parlamenta FBiH, te da prođe propisanu parlamentarnu proceduru, a u konačnici predložimo kolegama delegatima ovog Doma da isti usvoje, uvažavajući razloge navedene u njegovom obrazloženju.

Predsjednik Kluba delegata bošnjakog naroda
Muamer Zukić

NACRT

ZAKON
O PROPORCIONALNOJ ZASTUPLJENOSTI KONSTITUTIVNIH NARODA I OSTALIH
U FEDERACIJI BOSNE I HERCEGOVINE

Sarajevo, decembar 2025. godine

ZAKON
O PROPORCIONALNOJ ZASTUPLJENOSTI KONSTITUTIVNIH NARODA I OSTALIH
U FEDERACIJI BOSNE I HERCEGOVINE

I. OSNOVNE ODREDBE

Član 1.

(Predmet Zakona)

- (1) Ovim zakonom preciznije se uređuje proporcionalna zastupljenost konstitutivnih naroda i ostalih u Federaciji Bosne i Hercegovine, kantonima, gradovima i općinama, obaveze javnih institucija, rokovi za implementaciju i druga pitanja značajna za ostvarivanje proporcionalne zastupljenosti u skladu sa Ustavom Federacije Bosne i Hercegovine.

Član 2.

(Ustavni osnov proporcionalne zastupljenosti
i rok za njeno ostvarivanje)

- (1) Osnovu za izračunavanje i osiguranje proporcionalne zastupljenosti konstitutivnih naroda i ostalih predstavlja popis stanovništva iz 1991. godine do potpune provedbe Aneksa 7. Općeg okvirnog sporazuma za mir u Bosni i Hercegovini, u skladu sa članom IX.11a. Ustava Federacije Bosne i Hercegovine ("Službene novine FBiH", broj:1/94, 13/97, 16/02, 22/02, 52/02, 63/03, 9/04, 20/04, 33/04, 71/05, 72/05, 32/07-ispr., 88/08, 79/22, 80/22-ispr., 31/23).
- (2) Posljednji popis stanovništva u Bosni i Hercegovinu će se koristiti za izračunavanje i osiguranje proporcionalne zastupljenosti konstitutivnih naroda i ostalih u Federaciji Bosne i Hercegovine, kantonima, gradovima i općinama na privremenoj osnovi i to isključivo u prelaznom periodu od pet godina. Prelazni period od pet godina počinje da se računa od dana stupanja na snagu ovog Zakona.
- (3) Objavljeni rezultati posljednjeg popisa stanovništva iz stava (2) ovog člana će se koristiti u izračunavanjima proporcionalne zastupljenosti isključivo kao prelazno rješenje, a radi ostvarivanja potpune usklađenosti sa članom 4. ovog Zakona. Nakon isteka prelaznog perioda od pet godina, proporcionalna zastupljenost će se utvrđivati isključivo na osnovu popisa stanovništva iz 1991. godine.
- (4) U prelaznom periodu iz stava (2) ovog člana odstupanje procenta zaposlenih i postavljenih lica može iznositi najviše do 10% u odnosu na posljednji popis stanovništva.

Član 3.

(Definicije i obim primjene Zakona)

- (1) Proporcionalna zastupljenost u smislu ovog Zakona je zastupljenost konstitutivnih naroda i ostalih Federaciji Bosne i Hercegovine, kantonima, gradovima i općinama utvrđena Ustavom Federacije Bosne i Hercegovine i odredbama ovog Zakona.

- (2) Organom u smislu ovog zakona smatraju se organi uprave i upravne organizacije propisane Zakonom o organizaciji organa uprave u Federaciji Bosne i Hercegovine („Službene novine FBiH“ br.35/05) i kantonalnim propisima kojima se reguliše osnivanje i rad organa uprave i upravnih organizacija.
- (3) Lokalnom samoupravom u smislu ovog Zakona smatra se lokalna samouprava definisana Zakonom o principima lokalne samouprave u Federaciji Bosne i Hercegovine („Službene novine FBiH“, br. 49/06 i 51/09) i kantonalnim zakonima o lokalnoj samoupravi.
- (4) Zaposlenikom u smislu ovog Zakona smatraju se:
- državni službenici, uključujući rukovodeće, u organima uprave i upravnim organizacijama Federacije Bosne i Hercegovine, kantona, grada ili općine,
 - namještenici u organima uprave i upravnim organizacijama Federacije Bosne i Hercegovine, kantona, grada ili općine.
 - policijski službenici u Federaciji Bosne i Hercegovine i kantonima.
- (5) Pozicija u smislu ovog Zakona smatra se radno mjesto i postavljanje.
- (6) Odredbe ovog Zakona primjenjuju se na:
- uprave policije u Federaciji Bosne i Hercegovine i kantonima, sudsku policiju, stručne i druge službe organa zakonodavne, izvršne i sudske vlasti, stručne i druge službe gradske ili općinske uprave, pravobranilaštava Federacije Bosne i Hercegovine i kantona i ustanove za izvršenje krivičnih sankcija iz nadležnosti Federacije Bosne i Hercegovine.
 - sva postavljenja koja se vrše na osnovu propisa o državnim službenicima i namještenicima u Federaciji Bosne i Hercegovine, kantonima, gradovima i općinama.

II. OSTVARIVANJE PROPORCIONALNE ZASTUPLJENOSTI, POPUNJAVANJE UPRAŽNJENIH POZICIJA I ZAŠTITA PRAVA

Član 4.

(Ostvarivanje proporcionalne zastupljenosti)

- (1) Svi organi i institucije iz člana 3. ovog Zakona obavezni su osigurati proporcionalnu zastupljenost zaposlenika i postavljenih lica u skladu sa Ustavom Federacije Bosne i Hercegovine, a na način propisan ovim Zakonom.
- (2) Odredbe ovog Zakona primjenjivat će se u organima i institucijama člana 3. ovog Zakona gdje proporcionalna zastupljenost nije implementirana i u periodu dok se ne ostvari proporcionalna zastupljenost propisana Ustavom Federacije Bosne i Hercegovine.
- (3) Kako bi se osigurala proporcionalna zastupljenost konstitutivnih naroda i ostalih u skladu sa Ustavom Federacije Bosne i Hercegovine i ovim Zakonom svi organi i institucije iz člana 3. ovog Zakona, obavezni su u roku od 60 dana od dana stupanja na snagu ovog Zakona, izraditi Plan osiguranja proporcionalne zastupljenosti.

- (4) Plan osiguranja proporcionalne zastupljenosti iz stava (3) ovog člana obavezno sadrži precizne podatke o trenutnoj proporcionalnoj zastupljenosti konstitutivnih naroda i ostalih, kao i mjere i aktivnosti za ostvarivanje proporcionalne zastupljenosti u skladu sa Ustavom Federacije Bosne i Hercegovine i ovim Zakonom.
- (5) Svi organi i institucije iz člana 3. ovog Zakona su obavezne Plan osiguranja proporcionalne zastupljenosti objaviti na svojoj službenoj internet stranici i izvršiti dostavljanje u skladu sa članom 8. ovog Zakona.

Član 5.

(Prikupljanje i obrada podataka o etničkoj pripadnosti
u svrhu ostvarivanja proporcionalne zastupljenosti)

- (1) Svi organi i institucije iz člana 3. ovog Zakona obavezne su etničku pripadnost svih zaposlenika i postavljenih lica, uključujući rukovodna mjesta, utvrditi u skladu sa zakonom.
- (2) Svi organi i institucije iz člana 3. ovog Zakona obavezne su u roku od 30 od dana stupanja na snagu ovog Zakona izraditi i usvojiti posebnu internu proceduru kojom će propisati prikupljanje i obradu podataka o etničkoj pripadnosti zaposlenika i postavljenih lica, te odrediti odgovornu osobu za prikupljanje i obradu tih podataka.
- (3) Interna procedura za prikupljanje i obradu podataka iz st. (1) i (2) ovog člana minimalno uključuje:
 - sadržaj obrasca za izjašnjavanje o etničkoj pripadnosti;
 - distribuciju obrasca za izjašnjavanje zaposlenicima i postavljenim licima;
 - prikupljanje ispunjenih obrazaca uz poštivanje povjerljivosti;
 - kontrolu i verifikaciju podataka radi tačnosti i potpunosti;
 - izradu internog izvještaja prema propisanom obrascu;
 - utvrđivanje podataka o etničkoj pripadnosti na osnovu službene evidencije.
- (4) Odgovorna osoba iz stava (2) ovog člana ima obavezu:
 - prikupljati i vršiti obradu podataka;
 - osigurati poštivanje povjerljivosti prikupljanja i obrade podataka;
 - sastaviti i verificirati izvještaj o etničkoj pripadnosti;
 - dostaviti izvještaj odgovornom licu organa iz člana 3. ovog Zakona.
- (5) Izjašnjavanje o etničkoj pripadnosti zaposlenika i postavljenih lica vrši se isključivo u svrhu osiguranja proporcionalne zastupljenosti propisane Ustavom Federacije Bosne i Hercegovine i dosljedne provedbe ovog Zakona.
- (6) Podaci o etničkoj pripadnosti se prikupljaju, obrađuju i čuvaju u skladu sa Zakonom o zaštiti ličnih podataka („Službeni glasnik BiH“ br.12/25) i uz osiguranje anonimnosti i povjerljivosti u javnim izvještajima.
- (7) Podaci zaposlenika i postavljenih lica o etničkoj pripadnosti se čuvaju kao povjerljivi podaci, a u javnim izvještajima se objavljuju samo zbirni podaci bez otkrivanja identiteta zaposlenika, odnosno postavljenih lica.

Član 6.

(Popunjavanje upražnjenih pozicija)

- (1) Radi ostvarivanja proporcionalne zastupljenosti konstitutivnih naroda i ostalih u skladu sa Ustavom Federacije Bosne i Hercegovine i ovim Zakonom, javni konkurs/oglas za popunu upražnjenih pozicija mora sadržavati podatke o pripadnosti pozicija konstitutivnim narodima i ostalim.
- (2) U slučaju da javni konkurs/oglas nije usklađen sa stavom (1) ovog člana, organ ili institucija nadležna za njegovo objavljivanje, Agencija za državnu službu Federacije Bosne i Hercegovine, ministarstva unutrašnjih poslova, Sudska policija Federacije Bosne i Hercegovine, pravobranilaštva, ustanove za izvršenje krivičnih sankcija u Federaciji Bosne i Hercegovine i drugi nadležni organ, obavezna je od organa i institucije iz člana 3. ovog Zakona zatražiti usklađivanja javnog konkursa/oglasa sa odredbama ovog Zakona.
- (3) Javni konkurs/oglas za popunu upražnjenih pozicija obavezno se objavljuje u „Službenim novinama Federacije Bosne i Hercegovine“, dvije najtiražnije dnevne novine u Federaciji Bosne i Hercegovine i zvaničnoj internet stranici institucije koja raspisuje javni konkurs/oglas.
- (4) Ukoliko se na javni konkurs/oglas ne prijavi niko od pripadnika konstitutivnih naroda i ostalih koji ispunjava opće i posebne uslove na koje se odnosi tražena pozicija, javni konkurs/oglas će se ponoviti. Ukoliko se na ponovljenom javnom konkursu/oglasu ponovo ne prijavi niko od pripadnika konstitutivnih naroda i ostalih na koje se odnosi tražena pozicija primit će se kandidat koji ispunjava opće i posebne uslove iz javnog konkursa/oglasa bez obzira na proporcionalnu zastupljenost konstitutivnih naroda i ostalih.
- (5) Organi uprave i upravne organizacije koji primjenjuju Zakon o državnoj službi u Federaciji Bosne i Hercegovine, Zakon o namještenicima u organima državne službe u Federaciji Bosne i Hercegovine i (ili) kantonalne propise o državnim službenicima i namještenicima mogu osigurati proporcionalnu zastupljenost i kroz sporazumno preuzimanje državnih službenika ili namještenika.
- (6) Vlada Federacije Bosne i Hercegovine i vlade kantona obavezne su roku od 90 dana od dana stupanja na snagu ovog Zakona donijeti uredbu kojom će se urediti sva pitanja od kojih zavisi sporazumno preuzimanje državnih službenika i namještenika na nivou Federacije BiH, odnosno kantona, grada i općine.

Član 7.

(Zaštita prava)

- (1) Kandidat koji se prijavio na javni konkurs/oglas za zasnivanje radnog odnosa može protiv akta o izboru ili postavljenju podnijeti žalbu zbog nepoštivanja proporcionalne zastupljenosti konstitutivnih naroda i ostalih koja je propisana Ustavom Federacije Bosne i Hercegovine i preciznije uređena ovim Zakonom.
- (2) Žalba iz stava (1) ovog člana izjavljuje se nadležnom organu koji rješava u drugom stepenu prema Zakonu o državnoj službi u Federaciji Bosne i Hercegovine ("Službene novine F BiH", br. 29/03, 23/04, 39/04, 54/04, 67/05, 8/06, 77/06 -

odluka US, 34/10 - odluka US, 45/2010 - dr. zakon, 4/12, 99/15 i 9/17 - odluka US), Zakonu o namještenicima u organima državne službe u Federaciji Bosne i Hercegovine ("Službene novine FBiH", br. 49/2005, 45/2010 i 103/2021), Zakonu o policijskim službenicima Federacije Bosne i Hercegovine ("Službene novine FBiH", br. 27/05, 70/08, 45/10 - dr. zakon, 44/2011 i 13/18), Zakonu o sudskoj policiji u Federaciji Bosne i Hercegovine ("Službene novine FBiH" br.77/20), kantonalnim propisima o državnim službenicima i namještenicima i kantonalnim propisima o policijskim službenicima.

- (3) Žalba se podnosi u roku od 8 dana od prijema akta ili obavještenja o izboru ili postavljenju i ima suspenzivno dejstvo. Protiv odluke o žalbi, kandidat ima pravo podnijeti tužbu nadležnom sudu u roku od 15 dana od dana zaprimanja drugostepene odluke.
- (4) Organ nadležan za rješavanje po žalbi iz st. (1) i (2) ovog člana obavezan je donijeti odluku najkasnije u roku od 30 dana od dana zaprimanja žalbe.
- (5) Ukoliko je utvrđena povreda ovog Zakona koja se odnose na proporcionalnu zastupljenost konstitutivnih naroda i ostalih organa i institucije iz člana 3. ovog Zakona su obavezne poništiti i ponovo raspisati javni konkurs/oglas.

III. NOSIOCI OBAVEZA, ROKOVI I EVIDENCIJA

Član 8.

(Dostavljanje podataka o etničkoj strukturi)

- (1) Vlada Federacije Bosne i Hercegovine i vlade kantona, su obavezne jedanput godišnje u prvom kvartalu godine, dostaviti Parlamentu Federacije Bosne i Hercegovine Izvještaj za prethodnu godinu sa podacima o trenutnoj etničkoj strukturi zaposlenih u organima i institucijama iz člana 3. ovog Zakona, kao i podatke o planiranim aktivnostima za osiguranje etničke zastupljenosti u skladu sa članom 2. ovog Zakona. Sastavni dio Izvještaja je i Plan osiguranja proporcionalne zastupljenosti iz člana 4. ovog Zakona.
- (2) Na osnovu dostavljenih izvještaja iz stava (1) ovog člana, Parlament Federacije Bosne i Hercegovine je obavezan jedanput godišnje razmatrati osiguranje poštivanja ustavnog principa o proporcionalnoj zastupljenosti konstitutivnih naroda i ostalih u Federaciji Bosne i Hercegovine.
- (3) Vlada Federacije Bosne i Hercegovine Izvještaj iz stava (1) ovog člana obavezno dostavlja i predsjedniku i potpredsjednicima Federacije Bosne i Hercegovine.
- (4) Gradovi i općine su obavezni dostaviti podatke iz stava (1) ovog člana putem vlada kantona. Vlade kantona su obavezne objedinjene izvještaje za kanton, gradove i općine dostaviti Vladi Federacije Bosne i Hercegovine.

Član 9.

(Evidencija zaposlenika i postavljenih lica)

- (1) Radi efikasnijeg ostvarivanja ciljeva ovog Zakona, Vlada Federacije Bosne i Hercegovine će putem nadležnih federalnih ministarstva uspostaviti jedinstvenu evidenciju svih zaposlenika iz člana 3. ovog Zakona.

IV. NADZOR

Član 10.

(Upravni nadzor)

- (1) Upravni nadzor nad provođenjem ovog Zakona vrši Federalno ministarstvo pravde za nivo Federacije Bosne i Hercegovine, a kantonalna ministarstva za poslove pravosuđa i uprave za kanton, grad i općine koje pripadaju tom kantonu.

Član 11.

(Inspekcijski nadzor)

- (1) Inspekcijski nadzor nad primjenom ovog Zakona federalnim organima iz člana 3. ovog Zakona vrši federalna upravna inspekcija, a kantonalna upravna inspekcija u kantonalnim, gradskim i općinskim organima iz člana ovog Zakona.
- (2) Federalna upravna inspekcija i kantonalna upravna inspekcija su obavezne u posljednjem kvartalu tekuće godine dostaviti Vladi Federacije Bosne i Hercegovine izvještaj o utvrđenom činjeničnom stanju o poštivanju i primjeni ustavnog principa o proporcionalnoj zastupljenosti konstitutivnih naroda i ostalih u institucijama iz člana (3) ovog Zakona nad čijim radom vrše nadzor.

V. KAZNE NE ODREDBE

Član 12.

(Prekršajna odgovornost)

- (1) Novčanom kaznom u iznosu od 1.000 KM do 50.000 KM bit će kažnjen za prekršaj organ i institucija iz člana 3. ovog Zakona, ako:
 - ne izradi i ne objavi Plan osiguranja proporcionalne zastupljenosti u skladu sa članom 4. ovog Zakona,
 - ne odredi odgovornu osobu iz člana 5. ovog Zakona;
 - ne osigura obradu podataka u skladu sa članom 5. ovog Zakona;
 - ne izradi internu proceduru u roku iz člana 5. stav (2),
 - u javnom konkursu/oglasu ne naznači podatak o pripadnosti pozicije u skladu sa članom 6. stav (1) ovog Zakona,
 - ne dostavi nadležnom organu podatke o etničkoj pripadnosti u skladu sa članom 8. ovog Zakona,
 - ne uskladi interne propise u roku iz člana 13. stav (1) ovog Zakona.

- (2) Za prekršaj iz stava (1) ovog člana bit će kažnjeno i odgovorno lice u organu i instituciji iz člana 3. ovog Zakona novčanom kaznom u iznosu od 1.000 KM do 20.000 KM.

VI. PRELAZNE I ZAVRŠNE ODREDBE

Član 13.

(Usklađivanje propisa i internih akata sa ovim Zakonom)

- (1) Organi i institucije iz člana 3. ovog Zakona obavezni su uskladiti svoje interne akte sa Ustavom Federacije Bosne i Hercegovine i ovim Zakonom najkasnije u roku od šest mjeseci od dana stupanja na snagu ovog Zakona.
- (2) Propuštanje izvršenja obaveze iz stava (1) ovog člana predstavlja osnov za obavezno pokretanje postupka utvrđivanja odgovornosti rukovodioca organa i institucije iz člana 3. ovog Zakona.
- (3) Postupak utvrđivanja odgovornosti iz stava (2) ovog člana pokreće i provodi organ odnosno institucija koja je nadležna za vršenje nadzora nad zakonitošću rada rukovodioca organa ili institucije iz člana 3. ovog Zakona.
- (4) Ovaj Zakon će imati prvenstvo u odnosu na nekonzistentne odredbe bilo kojeg zakona, propisa ili akta u Federaciji Bosne i Hercegovine kojima se uređuje zapošljavanje i postavljanje u organe i institucije iz člana 3. ovog Zakona.
- (5) U slučaju sukoba pojedinih odredbi ovog Zakona sa drugim zakonima i propisima Federacije Bosne i Hercegovine, kantona, grada ili općine primjenjivat će se odredbe ovog Zakona.

Član 14.

(Stupanje na snagu)

- (1) Ovaj zakon stupa na snagu osmog dana od dana objavljivanja u „Službenim novinama FBiH”.

OBRAZLOŽENJE

I. USTAVNOPRAVNI OSNOV

Ustavni osnov za donošenje Zakona o proporcionalnoj zastupljenosti konstitutivnih naroda i ostalih u Federaciji BiH sadržan je u odredbi člana IX.11.a. (Amandman LII) i člana IV A.20. (1) d) Ustava Federacije Bosne i Hercegovine. Član IX.11.a Ustava Federacije Bosne i Hercegovine propisuje da će konstitutivni narodi i ostali biti proporcionalno zastupljeni u javnim institucijama u Federaciji BiH. Takva proporcionalna zastupljenost će se bazirati na popisu stanovništva iz 1991. godine, dok se Aneks 7. Općeg okvirnog sporazuma za mir u BiH u potpunosti ne provede. Ustav Federacije BiH je propisao da će se ovaj ustavni princip precizirati entitetskim zakonima. Entitetski zakoni će utvrditi konkretne rokove i regulisat će spomenuti princip, u skladu sa regionalnom etničkom strukturom entiteta i kantona. Također, na osnovu člana IV A.20. (1) d) Ustava, Parlament Federacije Bosne i Hercegovine, uz ostala ovlaštenja predviđena Ustavom, odgovoran je za donošenje zakona o obavljanju funkcija federalne vlasti.

II. RAZLOZI DONOŠENJA

Radi osiguranja ustavnog principa proporcionalne zastupljenosti konstitutivnih naroda i ostalih na području Federacije Bosne i Hercegovine, potrebno je donijeti zakon kojim će se preciznije urediti ostvarivanje ovog ustavnog principa.

Donošenje ovog Zakona omogućit će efikasnije provođenje Aneksa 7. Općeg okvirnog sporazuma za mir u BiH, te provođenje ustavnog principa proporcionalne zastupljenosti konstitutivnih naroda i ostalih.

III. OBRAZLOŽENJE PREDLOŽENIH ZAKONSKIH RJEŠENJA

Član 1. Zakona utvrđuje predmet Zakona.

Član 2. propisuje osnov za ostvarivanje proporcionalne zastupljenosti i rok za njeno ostvarivanje.

Član 3. sadrži definicije relevantnih pojmova koji se koriste u ovom Zakonu.

Član 4. uređuje način ostvarivanja proporcionalne zastupljenosti.

Član 5. uređuje prikupljanje i obradu podataka o etničkoj pripadnosti u svrhu ostvarivanja proporcionalne zastupljenosti.

Član 6. propisuje način popunjavanja upražnjenih pozicija.

Član 7. propisuje pravne mehanizme zaštite prava propisanih ovim Zakonom.

Čl. 8. i 9. propisuju obavezu dostavljanja podataka o etničkoj strukturi i uspostavu evidencije zaposlenika i postavljenih lica.

Čl. 10. i 11. propisuju je upravni i inspekcijski nadzor.

Član 12. propisuje prekršajnu odgovornost.

Čl. 13. i 14. propisuju usklađivanje akata sa odredbama ovog zakona, te stupanje na snagu Zakona.

IV. USKLAĐENOST PROPISA SA EVROPSKIM ZAKONODAVSTVOM

Pravnom stečevinom EU, niti evropskim pravom nije uređeno pitanje proporcionalne zastupljenosti konstitutivnih naroda i ostalih, te se stoga propisi ove vrste ne usaglašavaju sa zakonodavstvom Evropske unije.

V. PROVEDBENI MEHANIZMI I NAČIN OSIGURANJA POŠTIVANJA PROPISA

Upravni nadzor nad provođenjem ovog Zakona vrši Federalno ministarstvo pravde za nivo Federacije Bosne i Hercegovine, a kantonalna ministarstva za poslove pravosuđa i uprave za kanton, grad i općine koje pripadaju tom kantonu. Propisan je inspekcijski nadzor, te prekršaji za nepoštivanje pojedinih odredbi Zakona. Zakonom su propisani i mehanizmi pravne zaštite.

VI. KONSULTACIJE PRI IZRADI ZAKONA

Predlagač propisa će provesti javne konsultacije u Parlamentu Federacije Bosne i Hercegovine.

VII. OBRAZLOŽENJE FINANSIJSKIH SREDSTAVA ZA PROVOĐENJE ZAKONA I FINANSIJSKI EFEKTI ZAKONA

Za provođenje ovog Zakona nije potrebno obezbijediti dodatna sredstva u Budžetu Federacije BiH i budžetima kantona, gradova i općina.